

La Quotidiana 4-8-2015, p .15

Milliuns fugitivs sin il mund

■ (anr) Cumpareglià cun autras regiuns dal mund recepeschian l'Europa ed il nord global – tenor il perscrutader tudestg da migraziun, Jochen Otmer – memia paucs fugitivs. En tut saja i 14% da quels che tschertgian protecziun. 86% restian pia en pajais dal sid global. L'onn 2003 muntavia quella relaziun anc a 30:70%.

Tenor novissimas indicaziuns da l'UNO èn da preschent bunamain 60 milliuns carstgauns sin la fugia sin il mund. Da quels veglian 19,5 milliuns ir en l'exteriur ed 1,8 milliuns dumondan asil. La pli gronda migraziun haja lieu entaifer continents e regiuns. Ils motifs principals per migrar sajan violenza e conflicts. Migrar pervia da la lavur considereschian ils pli paucs sco schanza. La raschun principala saja la pupira. Blers carstgauns na possian simplamain betg sa lubir da migrar. Era la ferma resistenza da l'Uniun europeica encunter la migraziun haja ses effect.

Davent da l'avrigl fin la fin da zercladur 2015 han 7400 persunas dumandà – segund il Secretariat statal per migraziun – la Svizra per asil. Quai sajan radund 2900 dapli che durant l'emprim quartal da quest onn. Cumpareglià cun il medem temp da l'onn passà è la dumonda per asil creschida per na main che 37%. L'augment durant il segund quartal è en emprima lingia s'effectuà tras burgais da l'Eritrea.